

# ALAHADY FAHA-18 MANDAVANTAONA-TAONA B



## Handatsaka mofo avy any an-danitra ho anareo Aho

Ry Kristianina havana, miroso ny fiarahan-diantsika. Miara-dalana tokoa isika amin'izao sinaoda izao. Tsy irery isika fa miara-dalana amintsika i Kristy. Tsy miafina fa tsy mandeha ho azy ny fanatanterahana ny sinaody. Henontsika ireo vakiteny atolotry ny Eglizy amin'izao Alahady tsotra mandavan-taona izao. Maro no tsy mbola fola-kevitra ary misy aza no mametraka fanontaniana. Tsy zava-boavao izany zava-mitranga izany.

Navotan'ny Tompo tamin'ny fanandevozana tany Ejipta ny vahoaka. Nefa rentsika fa nimonomona tamin'i Moizy sy Aaron a izy ireo raha mafimafy ny fiainana tany an'efitra. Inona no nahatonga azy ireo hanana izany fihetsika izany ?

Anisan'ny antony nahatonga ny vahoaka Israely nivadika tamin'Andriamanitra ny *fanadinoana* ireo zava-mahagaga sy mahatalanjona nataony. Toa vahoaka be fanadinoana, mafy fo, tsy natoky sy tsy niankina tamin'ny Tompo. Efa nasehon'ny Tompo tamin'ny fahagagana nanasarahany roa ny ranomasina mena ny heriny. Tamin'izay dia nandia tany maina ny vahoaka Israely. I Moizy mpanompon'Andriamanitra no nitantana azy ireo. Izy no nivavaka, niresaka tamin'Andriamanitra. Ny Ejiptianina kosa indray dia maty satria rehefa

nandalo izy ireo dia niverina toy ny teo aloha ny ranomasina. Nitohy hatrany ny dian'ireo vahoaka Israely ireo. Ny tanjona dia ny hahatongavana any amin'ny Tany nampanantenaina.

Teny an-dalana, tany amin'ny tany efitra, dia nimonomonona tamin'i Moizy sy

Aaron a izy ireo satria noana. Ny fimonomononana anefa dia toa midika tsy hafaliana, fanakianana, tsy fahampian'ny fitokisana, tsy fankasitrahana.

Indrisy araka ny voalazantsika teo zavatra mahazo antsika mpanara- dia an'i Kristy amin'izao andro ankehitriny izao ihany koa io fomba fiainan'ny vahoak'Israely io. Mila mitandrina antsika fa mihaodihaody mandrakariva ny « fahavalo tsy hita maso » mitady handramatra. Fampianarana ho antsika ny vahoakan'Israely. Vao tsy ela akory izy ireo no nahita ny zava-mahagaga nataon'Andriamanitra, dia efa manomboka mimenomenona sy

Vakiteny I : .Eks.16, 2-4.12-15

Tononkira : Salamo 77,

Vakiteny II : Efez.4, 17. 20-24

Evanjely : Jn 6, 24-35

manao eson-teny ary manakiana Azy sy ireo mpanompony: *Inay anie izahay mba matin ny tanan'ny Tompo tany an-tany Ejipta raha ilay nipetraka teo anelanelan'ny vilany feno hena sy nihinana mofo mandra-pahavoky iny izahay; fa izao kosa nentinareo aty an'efitra izahay mba hahafaty mosary izao vahoaka be izao.*

Raha jerena amin'ny maso tsy miangatra izany dia aleon'izy ireo mijanona ho andevo, tsy manana ny maha-izy azy, voky toy izay olon'afaka. Mbola manembonembona ny tongolon'i Ejipta.

Matetika isika no manipika fa tsy hitovy na oviana na oviana ny talohan'ny Covid 19, sy vanim-potoanan'ny Covid 19 izay azo lazaina fa tena fijaliana, tena ady niteraka korontana maro sy manaraka ny ady, izany hoe fahafahana. Azo ampitovina amin'ny tantaran'ny vahoakan'Andriamanitra izao vanim-potoana iainantsika izao. Tsy mandeha ho azy ny firosoana amin'ny Pantekoty vaovao entin'ny sinaoda ka dia maro ny mavozo, matahotra....

Nohenoin'Andriamanitra ny fimenomenonan'ny zanak'Israely satria *Raiamandreny mpamelona Izy* araka ny lohahevitra naroso tetsy ambony. Tsy nitazam-potsiny fa nanome sakafy: *Nandatsaka mofo avy any an-danitra, nandefa mana.* Nanome mihoatra noho izay nilaina aza. Na izany aza dia tsy mety ny mimenomenona, izay midika ho tsy fitokisana amin'Andriamanitra. Tsara ny mangataka amim- pahatsorana sy amim-panetren-tena. Hoy i Jesoa hoe: Mangataha dia omena, mandondona dia ho vohàna ianareo.

Fampianarana ho antsika io zava-nitranga tamin'ny vahoaka tany an'efitra io. Mijaly isika izao. Ray, Baba no Andriamanitra. Tsy Andriamanitra lavitra no Andriamanitsika. Miara-dalana amintsika Izy fa indrindra amin'ny sinaoda tanterahantsika. Maniry tokoa isika mba ho « TONGA AMIN'NY TANY NAMPANAN-TENAINA izany hoe HO EO V MISIONERA VITA BATEMY IRAHINA KA TABERNAKLA VELONA MANORINA ETA FIANAKAVIAMBEN-JANAHARY FRATELLI TUTTI OLO ARAIKY ISIKA JIABY.

Tokana ny lalana amin'izany araka ny atorin'ireo tenin'Andriamanitra dia ny fibebahana sy ny fiovam-penitra mahery vaika eo amin'ny fomba fiainantsika. Izany indrindra no kendrentsika amin'izao sinaoda izao. Tsy isika fa ny Eglizy Eran-tany satria ity krizy ity, ity KORONTANAVIRUS dia tsy krizy ara-panahy fotsiny fa krizy maro lafy. Krizy niteraka korontana marobe eo amin'ny fiainana, eo amin'ny fifandraisana indrindra. Mitaka départ vaovao mba tsy ho rendrika. Tsy départ à zero fa départ vaovao ao amin'i Jesoa.

Manafatra antsika I Jesoa ao amin'ny Evanjely fa tsy maintsy miasa mba hahazo ny hanina maharitra. Matoky isika fa raha manao ny asan'Andriamanitra dia Izy no hanao ny asantsika.

Ndeha isika handinika izany rehetra miainga avy amin'ireo Tenin'Andriamanitra atolotry ny Eglizy anio Alahady Tsotra faha 18.

Raha ny sakafy ara-batana no resahina dia tsy ampy ny miandry ny mana milatsaka avy any an-danitra fa tsy maintsy miasa. Hoy i Md Paoly hoe : *Izay tsy miasa aoka izy aoka tsy hihinana.* Manamafy an'izany i Jesoa ao amin'ny Evanjely, tohin'izay efa novakina tamin'ny Alahady lasa teo. Nitady an'i Jesoa ny vahoaka noho ny nahitan'izy ireo fahagagana, nihinanany mofo ka voky. Hoy indrindra i Jesoa manentana hoe : *Miasa ianareo, tsy mba hahazo ny hanina mety ho levona, fa ny hanina maharitra ho aminny fiainana mandrakizay, dia izay omenny Zanakolona anareo fa Izy no nasian'Andriamanitra tombon-kase.* Ilaina tokoa ny sakafy ara-batana, kanefa tsy tokony hijanona amin'ny fitadiavana an'izany fotsiny. Tsy maintsy miasa ary mikatsaka hatrany ny hanina maharitra

amin'ny fiainana mandrakizay. Ambaran'i Jesoa mazava tsara fa Izy ihany no manome io hanina io.

Rehefa manatona an'i Jesoa izany isika dia tokony angatahina voalohany indrindra io sakafom-panahy io. Rehefa manao ny vavaka nampianarin'ny Tompo: *Omeo anay anio ny haninay isanandro*, dia tafiditra amin'io ihany koa ny Eokaristia, fa tsy ny sakafo ara-nofa fotsiny ihany. *Miasà ianareo* hoy i Jesoa mba tsy hiandry ho tolarana fotsiny ary mba hahazo ny hanina maharitra ho an'ny fiainana mandrakizay. Omen'i Jesoa maimaim-poana ho antsika ny Teniny sy ny Tenany, kanefa mila ny fandraisana anjara avy amintsika izany. Raha fintinina izany rehetra izany dia azo lazaina fa tsy mahazo mipetrapetraka intsony fa indrindra raha te-ho tafita isika izany hampivelatra ny mahaolona sy olon-drehetra araka ny sitrak'Andriamanitra. Miantso antsika tokoa Andriamanitra hiroso lalindalina kokoa hanova ny tontolom-pinoana, hanova ny tontolo iainana, hanova ny tontolom-piainana dia ny fiaraha-monina mba ho fiaraha-monina mifampitsimbina sy mifanasoa ao anatin'ny fikatsahana ny soa iombonana entan'ny fahamarinana sy fihavanana sady kristianina no Malagasy.

Toa ireo vahoaka nanodidina an'i Jesoa dia velom-panontaniana sy ahiahy aza. Inona no atao amin'izao sinaoda izao ?

*Inona àry no hataonay mba hiasanay ny asan'Andriamanitra?* hoy ireo vahoaka nanodina an'i Jesoa. Novaliany Jesoa hoe: *Ny hinoanareo Ilay nirahiny*. Ny zavatra andrasana amin'ireto vahoaka ireto izany dia ny finoana an'i Jesoa irak'Andriamanitra. I Md Joany ihany no efa nilaza fa: *Izay rehetra nandray Azy dia nomeny fahazoana ho tonga zanak'Andriamanitra, dia izay mino ny Anarany*. Mbola mitohy ihany ny fanontaniana napetrak'izy ireo: *Inona àry ny fahagagana ataonao, mba ho hitanay ka hinoanay Anao? Inona no asa ataonao?* Mangataka famantarana izy ireo, kanefa vao tsy ela akory i Jesoa no nanao famantarana, dia ny fampitomboana ny mofo sy ny hazandrano. Tsy nanao famantarana vaovao i Jesoa fa niezaka nanazava ny zava- mahagaga milaza ny asa ataony. Ireo vahoaka miresaka amin'i Jesoa dia manaiky ny zavamahagaga nataonny Tompo tamin'ireo razambeny fahiny, fa eto izy ireo dia tsy mahalala sy tsy manaiky an'i Jesoa ho irak'Andriamanitra. Tsy fantatr'izy ireo fa ireo zava-mahatalanjona nataonny Tompo fahiny dia tohiziny ao amin'i Jesoa.

Azontsika onona tsara izany ny antony hanaovantsika ny fandalinam-pinoana amin'izao sinaoda izao. Tsy maintsy mandinika ny anjara toeran'ny Katesizy na any antsekoly na any amin'ny fianakaviana « eglizy kely », any amin'ny eglizy fiombonana, any amin'ny eglizy fototra... Halalintsika ny anjara toeran'ny Sakramenta fito.

Ambaran'i Jesoa tamin'ireo nihaino Azy fa Andriamanitra no nanome ny mofo avy any an-danitra, fa tsy i Moizy akory. Efa nomeny ny vahoakany fahiny io, ary omeny ihany koa ankehitriny amin'ny alalan'i Jesoa. Ny mana tany an'efitra dia mofo avy any an-danitra fa tsy mahavelona mandrakizay, famantarana ihany. I Jesoa Kristy kosa no Mofo velona, nidina avy an-danitra. Tsy Mofon'ny fiainana fotsiny fa Mofon'Andriamanitra mihitsy, fanomezana lehibe indrindra. Avy eo dia nangatahin'ny vahoaka izany mofo izany: *Tompo ô, omeo anay mandrakariva izany mofo izany*, ka novalian'i Jesoa hoe: *Izaho no Mofon'aina; izay manatona Ahy tsy mba ho noana intsony ary izay mino Ahy tsy hangetaheta mandrakizay*. I Jesoa mihitsy no manambara tena *ho Mofonaina, Mofon'Andriamanitra* ho an'ny fiainan'izao tontolo izao.

Tsy ho noana intsony ary tsy hangetaheta mandrakizay tokoa ireo izay manatona sy

mandray, mitoetra, ary mifototra tanteraka amin'i Jesoa. Noana sy mangetaheta hasambarana, hafaliana ary fiadanana tokoa ny olona, fa ao amin'i Jesoa, i Jesoa mihitsy no manome izany an'izay manatona Azy. Ho antsika amin'izao fotoana izao dia ao amin'ny Eokaristia no hanatonatsika sy handraisantsika Azy ary iraisantsika tanteraka Aminy. Inoantsika sy raisintsika ao am-pony Vatana aman- dRany. Mazotoa hatrany àry manatona Azy sy handray Azy ary manaiky hohavaoziny.

Mila toe-panahy ny fivelomana ny sinaoda mba hitondra amin'ny tena fihavaozana marina voalazantsika eo ambony. Io no ambaran'i Md Paoly ao amin'ny vakiteny faharoa.

Mananatra sy mampitandrina ireo kristianina tany Efezy i Md Paoly mba tsy hanao fitondran- tenan-Jentily, izay mizotra manaraka ny hevi-poana. Tsy hahita an'i Jesoa eo anivon'ny fiainantsika tokoa isika raha tsy miova, raha tsy mibebaka. Toe-panahy fototra mampahomby ny fiarahan-dalana tanterahana amin'ny sinaoda.

Raha fintinana ny tian'i Md Paoly dia tsy maintsy zary Olom-baovao ao amin'i Kristy izany hoe tsy maintsy mandao ny zavatra tsizarizary taloha. Olom-baovao ka mitafy fiainam-baovao ; ny toetra sy ny fomba taloha tsy mifanaraka amin'ny maha EOVI MISIONERA dia ialàna avokoa. Hoy indrindra i Md Paoly hoe: *Hiala amin'ny fitondrantenanareo taloha, ka hamela ny olon-tranaininareo efa simban'ny fitaky ny filàndratsy, mba hohavaozina ao amin'ny saina amam-panahinareo ianareo, ka hitafy ny olombaovao, izay naorina araka an'Andriamanitra amin'ny fahamarinana amam-panamasinana tena izy tokoa.* Amin'ny fanomezana ny akanjo fotsy amin'ny Batemy dia misy teny tsara hotadidina sy ezahintsika iainana hatrany: *Olombaovao izao ianareo ary mitafy an'i Kristy. Iny akanjo fotsy madio iny anie hahatsiarovanareo ny fahamboniana nanandratana anareo. Ny havana aman-tsakaiza anie, na amin'ny teny ataony na ain'ny ohatra omeny, hanampy anareo hahatahiry azy tsy misy pentina hatrany amin'ny fiainana mandrakizay.* Mifanohantohana sy mifanampy isika samy kristianina mba samy hizotra amin'ny lalan'ny fitiavana sy ny fahamasinana, ary hiaina ny tena mahanak'Andriamanitra marina antsika, olom-baovao mitafy an'i Kristy.

Ry Jesoa Tompo nirahin'ny Ray Ianao hamelona anay. Nirahinao kosa ny Eglizy hitondra Anao Mofon'aina ka rehefa mandray Azy zary EOVI MISIONERA TABERNAKLA VELONA tahaka anao. Md Josefa Ray Mpiarao ny Eglizy erantany, mivavahà ho anay amin'izao ezaka ataonay izao. Amena

Mompera Arseveka Mgr Benjamin Ramarason